

## GUITS NE PXEEL PABL LO

### ZHA FILIP

---

**1** ¡Diuzh to grëse to!

Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacnie to Jesús; zigtaa tow, zigtaa zha ne zo lo tow, zigtagaa zha ne run xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

<sup>2</sup>Dios men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

<sup>3</sup>Zeene rsoladztaa naa to, rded naa xquizh lo Dios; <sup>4</sup>ni zeene rzodiidznie naa me, rley naa gon rnab naa lo me gacnie me to; <sup>5</sup>sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun to xyudar naa noseed naa miech Xtiidz Ndzon me. <sup>6</sup>Ni nappaa naa, zigne squi psilo Dios nozhixcuaa me lo xquielmban to, zigse zie dze laa me gzhixcuaaraa to, zeena nsinle zo to gal dze ne laa Jesús guiaad stib.

<sup>7</sup>Min co racladz naa, ni ib rieguiala sac ne nligaa rleyne naa to. Sac ib rsaande to naa, zigtaa zeene znu no naa ladzguiiba, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz Jesús. <sup>8</sup>Dios nan ganle pa lotaa nonie to guic naa, rquianë zdoonaa to, zigne rzacaque Jesús ne.

<sup>9</sup>Rnab naa lo Dios gacnie me to, zig zie dze gleyneraa to samiech to, tsabiiniraa to, <sup>10</sup>zeena guien to cue to niapse grë ncuane ndzinli gun to. Sca ine ndzinli nac lo xquielmban to, ni tib xtol to guien gal dze ne guiaad Jesús; <sup>11</sup>zaacse gban to. Ga glu to ganle lëë min co blu Jesús lo to, zeena sca csanglaa to Dios.

<sup>12</sup>Bets, bzian, racladz naa gacnan to ganle niicle tel pe nactaa ncuane nodeed naa, per led mincod gon cuëz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga. <sup>13</sup>Sac tel niina, zigtaa grë zha ne rquia dziin lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguiib. <sup>14</sup>Sac ndal grë bets zeene gon zho laa naa znu biab ladzguiib, laa zho bguiaalraa laa zho noseed miech Diidz Ndzon rii; peet rtoladzdraa zho, peet dzeb guindraa lo zho, masaque Dios rnalo zho.

<sup>15</sup>Parga nli no stib dii zha ne psilo noyūn dziin co, per laa zho noyūna loxaque par dien zha guiannziuu zho, sac nē rac zdoo zho ran zho zha none naa Xtiidz me. Per zigne no zha ne sca nac, noque zha ne nli dib zdoo zho quiaseed zho miech. <sup>16-17</sup>Lēē zha co nagon rlu ne nli rleynie zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xtiidz Jesús; laa zha ne sca noyūn dziin co par guiannziuu zho, rzac zho na tel mazdraa glaa guiaan zho lo naa, mazdraa lozh coguielnē zho naa ne laa naa znule no ladzguiib. <sup>18</sup>Per par naa, pex gun naa zho. Tel zha ne zie dib zdoow, zha ne zieedgaa dib zdoow, totsaque ne Xtiidz Jesús quiaseed zho miech; min co nac mine mazdraa rley naa.

<sup>19</sup>Ni zleyragaa naa, sac nan naa ib zrie naa zaatne nioogyu naa nu; sac lala quianab to lo Dios por naa, ni lala nacie zhiEspíritu Jesús naa. <sup>20</sup>Dib zdoo naa racladz naa, tiblque gac naa lēēb naa gan naa mine tedtaa naa, gdzind dze ne gun naa ncuane cuee xquielto naa. Racladz naa cxobnen naa ganle zha men rotaa nac Jesús; niicle tel niaca por min co yquiaaqui gut miech naa. <sup>21</sup>Sac gon, par naa laa naa mban par gun naa mine rnabey Jesús, ni zeene guetgaa naa, nannpaa naa tib guielbley nroob ne ygaa naa. <sup>22</sup>Per tel laga mban naa, nzianraa ncuane grielo gun naa lo me; dzigo nagon riendaque naa dien pa min wenraa. ¡Pe wena gbanraa naa, te wena ye prontga gbi naa lo guidzliu rii! <sup>23</sup>No hor rzaac naa gbanraa naa, nogaa hor rzaac naa tebaa laa naa wbile lo guidzliu rii; zeena ziagaa naa lo Jesús, sac nligaa zoot naa laa naa bdzingle lo me. ¡Min co mazdraa wen, lēdle cuēz naa lo guidzliu rii! <sup>24</sup>Per rien naa ible none cuēz naa, sac rquiinpaa to naa. <sup>25</sup>Mincoxe nagon waa, rgobey naa zbanraa naa, zeena lozh cseed naa to choobraa to lo Xtiidz Jesús, ine nley gac to laa to rililadza; <sup>26</sup>ni zeene laa naa gbire guial lo to i, rien naa nroob gley to, zdeed to xquizh lo Jesús porne racniē me naa.

<sup>27</sup>Per mine rsopaa naa diidz lo to gon: Goltsoxco golban zigne no gban zha ne ngab xnēz Jesús, zeena niicle telne grielod guial naa, racladz naa gon naa tipse nac to grē to, tiblque dziits zo to lo Xtiidz Dios; ni noxco to dien zha gliladz grēraa miech Jesús, <sup>28</sup>ni lalnu rdziebde to grē zha ne rlēē ran to. Ga guien zho ganle nēz ne nitlo zho zie zho, sangue to ga rlu ne laa Dios psilaale to lo xtol to, ni nacie me to. <sup>29</sup>Sac gon, ible none gan to guielnē porne no to xnēz me, bzooblod Jesús to loxaque par ygaa to guielnzaac qui gnalo to me. <sup>30</sup>Niicle tow, niicle naagaaw none dzian ne min co. Gonle to ganle zha nactaa grē ncuane bdeed naa, ni ziyongaa to grē mine nodeed naa niina.

### Goc Jesús tib men ndooladz

**2** Nanle to ganle Jesús rchoobladz zdoo to, me rlu zha gleynie to samiech to, tipse nac to ni Espíritu Sant nacie to; nanle to ganle none yquia zdoo to samiech to. <sup>2</sup>Gacxe nana sca, golconley zdoo naa, ine tipse golgac, golleynie grē zha ne nacgrē to, tipse golnee, ni tipse golgac tel pa lo dziin ne gnediidz to gun to. <sup>3</sup>Ncuane gun to, guiabde to ne laa to guna par dien zha csanwin to stib miech, zeen dien zha guiannziuu to; sinque ine ndooladz

golḡac, masaque golḡtsienie guic ne nonraa stib miech lo to. <sup>4</sup>Ib yguibde to ne lose to yquiiin ncuaaṅe guṅ to, sinque golḡuib dien zha guṅ to xyudar grēraa miech.

<sup>5</sup>Golḡsoladz ganḡe pa lotaa ndooladz goc Jesús leṅ dze ne biaadted me lo guidzliu, scaquegaa nasca ndooladz golḡac. <sup>6</sup>Sac tel me:

Niicle ne Dios nac me,  
per led miṅcod niab me nrieed me lo guieḡndzon ne no me,

<sup>7</sup>sinque grēse zigne nac me, laa me psanḡa tib lad,  
laa me goc zig tib ngundziin win,  
biaad me gol me lo guidzliu rii goc me miech.

Nacle me miech,

<sup>8</sup>ni bii psanḡwin me me lo miech,  
haxta bdeed me diidz pquiaa zho me lo cruz,  
zig ruṅ zho cho grē zha yozh.

<sup>9</sup>Miṅcocxe waa, psanḡlaaraa Dios me,  
biaan me men ne mazdraa non, men ne mazdraa nroob;

<sup>10</sup>zeenḡa zeene laa me gaquiet,  
grēse zha ne no gbaa, grēse zha ne no lo guidzliu,  
ni grēse zha ne no nēz leṅ guidzliu, laa zho yquiiitsgzhib,

<sup>11</sup>ni grēse zho laa zho cueero, guiab zho ganḡe ne nli me nac men ne rnabey.

Ga laa zho cxobnen ganḡe, zha men nroobtaa nac Dios, men ne nac Pxoḡ me.

### Zha ne nac biini lo guidzliu rii

<sup>12</sup>Bets, bzian, ne nligaa rleynie naa to. Laa naa rnab lo to (zigne bioxco to bin to xtudz naa zeene blēz naa lo to i, scaquegaa niina niicle ne zit zo naa, golḡgon mine rne naa nu), ib gdeete to diidz guiab to ladznia doḡ stib, niina ne laa Dios psilaale to; golḡguien tsieniewguite guic to. <sup>13</sup>Benque Dioszhal rsiab guic to rquiabladz to guṅ to mine racladz me, ni scagaa me racnien to rrieelo ruṅ tow.

<sup>14</sup>Ni ncuaaṅe rieguial to guṅ to, ine nguieel golḡac golḡgūna, peet glisquide to, ni niicle tiḡdiidzdgaa to; <sup>15</sup>zeenḡa tsod pe nacne cho glisqui guiab zho laa to pe falt, pe doḡ ne quiayun. Gollu ganḡe nli xpēēdle Dios nac to; zaacse golḡban, niicle ne ladaque grē miech ntseeb, miech ncow ne ndxie lo guidzliu rii no to. Golḡac zig tib biini lo zho, zigne rziini mel gbaa lo ncow ne nac guieel. <sup>16</sup>Ib csaande to Xtiidz Ndzon Jesús, diidz ne rdeed guieḡmban, lēew golḡconie guic to. Sca golḡac, zeenḡa gal dze ne laa Jesús guiaad stib, per nli gley naa ganḡ naa led zhlēd brie naa bialḡ naa, bialḡseed naa to. <sup>17</sup>Zig nac niina, tel niaca mine no gded naa xquieḡmban naa gaca zig tib gon, parne dib zdooraa to gliladz to Dios, haxta zley naa gded naa xquieḡmban naa; sac racladz naa ye to yгаа guieḡbley. <sup>18</sup>¡Golḡley sca! Zigne no guieḡbley rii zdoo naa, scaquegaa to golḡconley zdoo to, zeenḡa grē ne gley.

### Timoté ni Epafrodit

<sup>19</sup>Tejne gneedz men ndzon ne rnabey ne diidz, racladz naa cxeelnioab naa Timoté guiaadwi dien zha no to, zeena haxta stibgac zdoon naa zeene laa Timoté glansonie diidz lo naa. <sup>20</sup>Me cxel naa, sac guiend stib zha ne zienie guic zig zienie guic naa, tel led med; sac tel me nonie to guic me. <sup>21</sup>Grëraa zho, ncuane yquiin lo zho rioxco zho, laa ne tsoxco zho mine nac xtsiin Jesús. <sup>22</sup>Laa Timoté, led nanle to ganle zha ndzinli nac me, tel niina ine tib mëed nac me lo naa, nroob yudar ne quiayun me noseed no miech Xtiidz Ndzon Jesús.

<sup>23</sup>Ible laa guic naa no cxel naa me lo to i, loxaque gacnanse naa dien zha csan wxtis rii xcuent naa nu. <sup>24</sup>Ni ye naa nend pronaque guialso naa i dien yo to, sac rien naa ible zneedz Dios diidz guial naa.

<sup>25-26</sup>Ni rgobey naa nonguielaquew cxel naa bets ne Epafrodit guiaad me nëz qui, sac laa me rbanle to, ni no me zhgab bin me laa to gocnan ne laa me bzhaacnë. Nli laa to pxeel me lo naa nu, ni blactagaa noyun me xyudar naa ne znu mban nodeed naa, blactaa noyacnie me naa lo dziin ne nodziun no. <sup>27</sup>Ni nligaa bzhaacnë me, nzhooc goc me zootle laa me nietle; per pquia zdoon Dios me ni pquiaagaa zdoon Dios naa peet gooc me, sac gon nole naa guielnë, ni tel pe niacaque me mazdraa niac nroob xquielnë naa. <sup>28</sup>Min co nagon laa naa cxelgazh me, zeena gley to gan to lo me stib, ni scagaa niicle naaw zley naa. <sup>29</sup>Golley sca gon golcaania me, golguien ganle bets to nac me, bets new grë ne ne nac ne zha ne ngab lo Dios; ni grëragaa zha ne nac zig nac me, golleynie zho. <sup>30</sup>Golgan ganle, tel me haxta bdedlaa me niet me nu niina ne biaadgun me xtsiin Jesús; per ib pquiad zdoon me me, bleeladz me xquielmban me biaadgun me xyudar naa, porne brieelod niaad-zhal to.

### Ncuane mazdraa non

**3** Bets, bzian, golley ne laa to ngab lo Jesús men ndzon ne rnabey. Mine ziesole naa diidz lo to, guieete naa zneque naaw stib, sac ncuane yquingaa lo tow: <sup>2</sup>¡lb cxende to lo grë mëcw dox qui! Grë miech ndzinlid ne squi quianzë, racladz zho tsopaa zha bgui bey, sac rzac zho zha ne sca tso bey, ga rlu xnëzle Dios no zho.

<sup>3</sup>Ndionle ne ganle zha nac diidzli, zha ne rleynie Dios zigne rsiaab Espiritu Sant guic zho, ni dib zdoon zho run zhow, zha co nac zha ne nlipaa no xnëz me. Zig nac ne, ne nac ne zha ne nole xnëz me, Jesús nac men ne rdziunnon ne, sac ndion ne por me laa Dios ycaania ne; rnalod ne grë ncuane laglaase, <sup>4</sup>sac tel grë ncuane cow; zig nac naa pe zhistaa ncuane dzigo zrieelo gnalo naa.

Tel no zha ne rzac por ncuane been zho min co laa Dios csilaa zho; tel scaw, nroobraa ncuane ziyun naa lo zho: <sup>5</sup>Xon ngbidz raap naa laa naa birole bey co, zha Israel nac naa, lo xti Benjamín zial naa, merpaa zha Israel nac naa; sac niicle pxoz naaw, niicle xnial naaw zha Israel nac me. Niicle xleygaa zha Israela, nroob pseed naaw, zha farisé goc naa; <sup>6</sup>bleyniedox naa grë mine zianal zha Israel, gacxe waa pquianal naa grë miech ne no xnëz Jesús; zig

nac miñe raquiet lo ley, grësew beñ naaw zigne naca, ib biod dze ne cho zha pe nlisqui lo naa.

<sup>7</sup>Lëë grë ncuaañ co rnalo naa leñ dze co, sangue niina Jesús rnalo naa, grëse ncuaañ co laaw psañle naa tib lad. <sup>8</sup>Ni led loxaque psandse naaw tiblād, sinque grësew peet nondraaw lo naa, miñe non lo naa niina nacne beenbey naa cho nac Jesús, meñ ndzon ne rnabey naa. Niina ne laa naa runbey me, grëse ncuaañ co rzaac naaw zig rzac ne grë pe guizh beed, sac laa naa racladz gbigraa naa lo me, ni gacniera naa me.

<sup>9</sup>Zanałdraa naa guñ naa miñe rnabey ley par guiaanmbe naa lo dol, sinque laa naa zanał dib zdoo naa gliladz naa cho nac Jesús; sac zha ne dib zdoo rnalo me, sanmbe Dios zho lo dol. <sup>10</sup>Racladz naa guienraa naa zha nac Jesús, ni gaap naa poder ne pquiin Dios zeene blische me me leñ baa, ye naa teed grë miñe bded me, ni cueeladz naa xquielmban naa zigne bleeladz me xquielmban me; <sup>11</sup>ni scagaa, nanpaa naa ye naa grieeban gał dze ne guiadbeeban me grë zha ne no xnëz me.

### Stsëë Jesús xcuerp zha ne ngab lo me

<sup>12</sup>Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow, sac nanpaa naa zac naa zigne no guic me gac naa zeene psilaa me naa. <sup>13</sup>Bets, bzian, gard gun naa gan; per xco co no naa; grëse ncuaañe bded laaw biaanladzle naa, laa guic naa zienie ncuaañe naraa ziaad. <sup>14</sup>Masaque rzaac naa niina zig rzac zha ne rie prueb lo corr, rded naa fuerz gdziñ naa zaatne gneedz Dios zhipremio naa, guielnzaac ne rbedz Dios ne ygaa ne zeene laa ne rililadz Jesús.

<sup>15</sup>Ni ib znu none tsonie guic grë zha ne nlipaa dziits zo lo Xtiidz Dios; telne nogaa bla zha ne rzac led scada, per Dios gdeed guielbiini lo zho guien zho ganle zha naca. <sup>16</sup>Ni negaa, grë miñe rienle ne zha nac, none gban new.

<sup>17</sup>Bets, bzian, golwi ganle zha mban naa, ni zha mbangaa grë zha ne zianał miñe blu no lo to grë to; dzigo sca golban. <sup>18</sup>Sac gonñ zian zha ne nacgrë to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladztaa zho, rlëë zho ron zho pe nac gut Jesús lo cruz; <sup>19</sup>ni nëz ne nitlo zho ga zie zho. Laa ne tsianał zho miñe rnabey Dios, laa zho zianał grë ncuaañe gdeed guxt zdoo zho, ncuaañe gdeed guxt xcuerp zho. Loxaque grë ncuaañe mbee guielto zianał zho, per zha rlozhd gleynie zhow; niapse grë ncuaañ lo guidzliu rii nonie guic zho. <sup>20</sup>Sangue ne, laa ne zianał ncuaañe ygaa ne gbaa, sac gbaa nac zaatne ngab ne, ni laa ne quiambiaaz quiet Jesús gbaa guiaad me stib (me nac meñ ne psilaa miech lo dol, me nac meñ ndzon ne rnabey); <sup>21</sup>zeena ctsëë me xcuerp beñ wiich ne nu, gaca zig nac xcuerp ndzon me. Ni ib zun mew, sac nroob poder ne rap me rnabey me grëtaa ncuaañe no.

### Rnab Pabl nley gac zha Filip

**4** Bets, bzian, ne nlipaa gon rleynie naa to, haxta rzaac naa tebaa laa naa ranle lo to; to nac xquielbley naa, to nac zig tib premio lo naa por grëtaa xtsiin Jesús mine ben naa lo to. Laa naa rso diidz lo to, tibaque squi dziits golso, ib csaande to zhiwseed Jesús.

<sup>2</sup>Rnab naa lo bzian ne Evodia, ni lo bzian ne Síntique glëëlsadraa zho, none tipse gnee zho; sac gon bel zho, xnëz Dios no zho grop zho. <sup>3</sup>Ni luu gon bets, ne nac luu zha ne tibaque quiayacnie naa lo dziin ne quiadziuu ne, laa naa rnab lo luu bnee lo grop wnaa qui gneewen zho stib, sac gon ye zho blactaa mine bded zho zeene bzënal zho zhits naa biotiiz no Xtiidz Jesús, ni zeene güeynalгаа zho zhits Clement, ni zla zha ne rdziuungza no dziin. Laa lë zho zhooble len libr ne quia lë grëse miech ne bgaale guielmban ne gdzindraa dze lozh.

<sup>4</sup>¡Golley sca, tibaque golley! ¡Golgan ganle lo Jesús ngab to! Ni rneque naaw stib; ¡Golley! <sup>5</sup>Golguien zaacse golbannie grëse samiech to, zeena haxta gzëëb diidz ganle ne nli miech ndzinli, miech ndooladz nac to. ¡Golguien ganle, ile ziaad men ndzon ne rnabey ne!

<sup>6</sup>Tel pe nac grë ncuaaane quiaaded to, tsoode to zhgab, gdziebde to, sinque golzodiidznie Dios, golsan grësew ladznia me; per led loxaque gnabds to, sinque golsoladz goldeed xquizh lo me. <sup>7</sup>Ni zeene sca csa to grë xliaadz to ladznia me, haxta tibliladz guiaan zdoo to, peet dzeb tsoniedraa zdoo to, peet zhgab tsoniedraa guic to, masaque Jesús nac men ne nacie to; grëraa miech ib guien zho zha nac ne scataa tibliladz rac to.

<sup>8</sup>Bets, bzian, nu ne laa naa csiaalle guits rii laa naa rnab lo to, min rii golconie guic to:

niapse mine nac diidzli,  
niapse grë ncuaaane nonguiel gac,  
niapse grë ncuaaane rac zigne nac diidzli,  
niapse grë ncuaaane mbe,  
niapse grë ncuaaane gleynie miech,  
niapse grë ncuaaane gley miech gon zho,  
niapse grë ncuaaane yquiin,  
niapse grë ncuaaane gzee zdoo miech ni gleynie zho.

Grë min rii golconie guic to, ni lëew goltsoxco gun to.

<sup>9</sup>Ni golguien gon, grë mine pseed naa to, mine psan naa diidz lo to gun to, grë mine bin to bne naa lo to, mine gon to ben naa, grë min co goltsienal; zeena scagaa zacnie Dios to ib peet zhgab ctsebdraa to.

### Gon ne bdeed zha Filip

<sup>10</sup>Ne nlipaa rded naa xquizh lo men ndzon ne rnabey ne, ni rley naa ne laa to pxeel grë ncuaaane yquiin naa stib. Nan naa ne led biaanladzde to naa, sac tibaque noxco to dien zha gun to xyudar naa; sinque bdeedniobda diidz. <sup>11</sup>Rley

naa ne laa to psoladz naa, maase niicle nodpaa naa zhgab co dien pa gree pe yquii naa, sac pseedle naa peet zienied guic naa niicle tel zhataa nodeed naa. <sup>12</sup>Nañ naa zha nac guielprob, ni nanquegaa naa zha nac zeene quianie ne nroob ncuaañe yquii ne. Pseedle naa rzac zdoo naa miñe nodeedtaa naa, niicle zeene biodzë zdoo naaw, zeene rcaabedzгаа naaw; niicle zeene nroob ncuaañe yquii naa no, zeene peet guiñdgaa. <sup>13</sup>¡Grësew rrieelo naa, sacne nacie Jesús naa, me rneedz xfuerz naa! <sup>14</sup>Per wen ga been to, pxeel to ncuaañe pquii naa lëëtaque len dze ne peet guiñd lo naa.

<sup>15</sup>Zeene brie naa nëz xtan zha Macedon i, len dze ne wriin psilo noseed naa miech Xtiidz Ndzon Jesús ga, tosaque nac zha ne been xyudar naa, beenlo to gon pxeel to lo naa, porne rleynie to dziin rii. <sup>16</sup>Scasaque len dze ne no naa Tesalónica, blalaa vuelto pxeel to pe pquii naa.

<sup>17</sup>Guiabde to togo bod ne dien zha ygadraa miech lo naa gane rzetpaa naaw; lëda, sinque rley naa ne squi rala zdoo to rgad to, sac squi nroobraa guieñzaac ne ygaa to. <sup>18</sup>Tel na gon, grële ncuaañe yquii naa no, haxta nrooblew nu. Ni ne pxeelaque to Epafrodit biaadsan stib nëza, haxta bdedsole goclow lo naa nu. Grëtaa ncuaañe bgad to lo naa, rrieequia naca zig tib gon ne bdeed to lo Dios, zig tib gox ndzon ne sac zdoo me ycaania me.

<sup>19</sup>Scagaa niina nagon, grëse ncuaañe yquintaa to, Dios men ndzon ne rliladz ne, me gneedza lo to, porne nligaa dib zdoo to rliladz to Jesús; sac gon, nroobdoo grë guieñdzon, grë guieñzaac ne rap Dios. <sup>20</sup>¡Lëë xDios ne ga, me nac Pxoze ne grëse ne! ¡Gotsaa dziuunnon ne me sca, mesi gdziñd dze ne nitlo xquieñdzon me! Sca rieguiala.

<sup>21</sup>Goldeed tib zhibdiuzh naa lo grëse zha ne no xnëz Jesús i, grë zha ne squi noxco mban zigne racladz Dios. Scagaa golcaania zhibdiuzh grë zha bets ne, zha ne no lo naa nu. <sup>22</sup>Golcaania zhibdiuzh grëse zha ne no nu, zha ne rliladz Jesús; haxta ye grë zha ne rquia dziin lo rey Roma nu, laa zho rxeel zhibdiuzh zho lo to.

<sup>23</sup>Jesús, men ndzon ne rnabey ne; me noxco to, me nonie grë zhizhgab to. ¡Me gunlay to grëse to! *Pabl*